

լազգիք արգելին գնա, և ոչ ետուն նմա թոյլ արկանել 'ի նա ձեռս: Պաշտօնուր գրեաց գիր աղաչանաց 'ի Դուռն, և յայտ արար թէ՝ Եկեղեցին Համարաձման 'ի վաղ ժամանակաց անտի է՝ 'ի ձեռս Հայոց, ուր կատարեն զպաշտամունս իւրեանց, այժմ՝ քայքայեալ աւերի և այլազգիք բարձեալ տանեն զքարինս նորին, և արգելուն զնորոգութիւնն: Գրեցաւ հրովարտակ վասն այսր առ դատաւորն Երուսաղէմի, վերահասու լինել գործոյն, և իմանալ թէ՝ ունի՞ն Հայք գիր ինչ 'ի դատարանէ վասն այնր, և հակառակ օրինաց հրոնանալ ումեք 'ի վերայ նոցա, և չանցանել քան զչափ նախնի դրից շինուածոյն, և զհակառակողսն յականէ յանուանէ ծանուցանել 'ի Դուռն, ԲԴԷ (1556): Սակայն այս գործ շինութեան մնաց մինչեւ 'ի դարձ Անդրիաս Պատրիարքի 'ի Թադաւորեալ քաղաքէ, զկնի չորից ամաց, որպէս տեսցի արգ:

Իսկ Անդրիաս Պատրիարք դարձ արար 'ի Կոստանդնուպօլսոյ յԵրուսաղէմ յաթոռ իւր, և յաւուր միում յանդիման եղեւ դատաւորին, և յայտ արար նմա զամենայն հանգամանս աւերածոց եկեղեցւոյն Համարաձման, զի ձեղքեալ էր դմբեթն 'ի վերայ ոտնատեղւոյն Գրիստոսի, պատահանքն քակեալ, և այլ շինուածք ներքոյ և արտաքոյ եղծեալ և ապականեալ, սալայատակք գաւթին խանգարեալ, շրջապատ որմն անկեալ և խոնարհեալ: Եւ 'ի ժամանակէ անտի՝ յորում պարսպէին զքաղաքն Երուսաղէմ՝ լեալ էր մակաղատեղի խաչանց և գոմ ոչխարաց, մատնեալ յաղտեղութիւն տեղին սուրբ: Եւ ապա խնդրեաց ելանել 'ի քննութիւն, և տալ հրաման շինութեան և նորոգութեան: Իսկ դատաւորն առաքեաց զոմանս յերեւելեացն այլազգեաց, ընդ որս էր և ճարտարապետ քաղաքին, և 'ի քննութիւնս առեալ զամենայն հանգամանս տեղւոյն, գտին, որպէս պատմեալ էր Անդրիաս: Եւ չափեաց ճարտարապետքն զորմն հիւսիսային՝ յարեւելից յարեւմուտս, և եզիտ զայն քակեալ 50 կանգուն յերկայն, և 10 'ի բարձր, հաւասար հին մնացորդաց որմոյն: Որմն արեւելից, չափեալ 'ի հիւսիսոյ 'ի հարաւ, 70 կանգուն յերկայն, և 10 'ի բարձր, հարաւային, յարեւելից յարեւմուտս, յառաջին անկիւնէ մինչ 'ի դուռն արտաքին՝ 30 յերկայն, եւ 10 'ի բարձր